

37<sup>me</sup> 1525

2

EXTRAICT DES  
ANCIENS STATVTS  
DE L'VNIVERSITE DE  
POICTIERS, CONCERNANT  
le deuoir & charge des Be-  
deaux & Officiers de la-  
dite Vniuersité.




A POICTIERS,  
Par IULIAN THOREAU, Imprimeur  
du Roy, & de l'Vniuersité.

---

M. DC. XXVIII.









# EXTRAIT DES ANCIENS

*Statuts de l'Uniuersité de Poictiers, con-  
cernans le deuoir & charge des Be-  
deaux & Officiers de ladite  
Vniuersité.*

**T** O V S Bedeaux sont tenus  
d'exercer leur office en per-  
sonne, & d'aller querir mon-  
sieur le Recteur en sa maison,  
& l'accompagner allant aux huit Con-  
gregations generales de ladite Vniuersité,  
qui se tiennent.

SÇA VOIR,

La premiere le 20. ou 21. Ianuier.

La seconde le 21. ou 22. Mars.

La troiliesme le 23. ou 24. Aueil.

La quatriesme le 22. ou 23. Iuin.

La cinquiesme le 20. ou 21. Iuillet.

La sixiesme le 10. ou 11. d'Octobre



La septiesme le 10. ou 11. Nouembre.

La huietiesme le 22. ou 23. Decembre.

Comme aussi aux quatre seruices des deffunts qui se celebrent.

Le 1. le 22. Ianuier, iour de saint Vincent, au Conuent des Peres Iacobins.

Le 2. le 25. Aueil, iour de saint Marc, au Conuent des Peres Augustins.

Le 3. le 22. Iuillet, iour & Feste de la Magdelaine, au Conuent des Peres Cordeliers.

Et le 4. le 11. Nouembre iour de saint Martin, au Conuent des Peres Carmes.

Et aussi le 12. Aoust à la Messe qui se celebre au Conuent des Peres Iacobins.

Comme aussi aux actes publics & solennels de l'Vniuersité..

Sçauoir, à la Procession qui se celebre le iour & Feste de saint Thomas d'Aquin, qui est le 7. de Mars.

La vigile de saint Hilaire qui est le 25. Iuin, & au iour & Feste de saint Barthelemy, qui est le 25. Aoust.



5  
Comme aussi, aux Processions publiques & solennelles, qui se celebrent en cette Ville.

Sçauoir est, la Procession, qui se fait le Lundy d'apres la Feste de Pasques.

Celle des Rogations.

Du saint Sacrement.

De S. Cloüaud & autres processions.

Comme aussi aux entrées des Roys, Princes, & autres, & à tous actes publics & solennels de ladite Vniuersité, comme receptions de Docteurs, & Licences publiques.

Seront tenus lesdits Bedeaux seruir Monsieur le Recteur par quartier, selon l'ordre qui leur sera prescrit cy apres, & l'accompagner tant en allant à la Messe de ladite Vniuersité, qui se celebre par chacun Dimanche au Conuent desdits Freres Prescheurs de cetteditte Ville, que en retournant, comme aussi de le venir trouuer lors qu'il leur mandera, & de l'assister lors qu'il voudra aller faire les



visites des Colleges, & lors qu'il vouldra assister à quelques obseques & funerailles, ou à quelques actes particuliers.

Et pour le service particulier & ordinaire tant des Bedeaux generaux des facultez de Theologie, Medecine & des Arts, que des Bedeaux des quatre nations, a esté reiglé ainsi qu'ils s'ensuit.

Sçauoir est, que pour le quartier qui commencera à la feste de Nostre Dame de Mars de cette année presente mil six cens vingt-huict, & finira à la Feste de saint Iean Baptiste, serviront les nommez, Denys Damureau, Bedeau de la nation de Berry,

Iean Lacrosc Bedeau de la nation de Touraine, pour Coadjuteur.

Et pour le quartier qui commencera à la Feste de saint Iean prochaine, & finira à la Feste de S. Denys, serviront:

Iean Lacrosc, Bedeau de la nation de Touraine,

Et Geoffroy Depois, Bedeau general.



de la faculté des Arts, pour Coadjuteur.

Et pour le quartier qui commencera à la feste de saint Denis, & finira le vingt-troisiesme de Decembre. Ledit Geoffroy Depois, Bedeau general de la faculté des Arts, & Toussainct Dancereau Bedeau general de la faculté de Medecine pour Coadjuteur.

Et pour le quartier qui commencera le vingt-troisiesme de Decembre de cette année presente & finira le vingt-quatriesme de Mars de l'année mil six cens vingt-neuf, serviront:

Ledit Toussainct Dancereau, & Pierre Fressines Bedeau general de la faculté de Theologie pour Coadjuteur.

Et pour le quartier qui commencera le vingt-quatrieme Mars mil six cent vingt-neuf, & finira le vingt-quatriesme Iuin de ladite année, serviront:

Ledit Fressines, & Vincent Bourdaiseau Bedeau de la nation de France, pour Coadjuteur.



Et pour le quartier commençant au vingt-quatriesme Iuin , & finissant au dixiesme Octobre, seruiron:

Ledit Vincent Bourdaiseau , & Pierre Perrotin, Bedeau de la nation d'Aquitaine.

Et pour le quartier commençant au dixiesme Octobre, & finissant au vingt-troisiesme Decembre, seruiron:

Ledit Pierre Perrotin.

Et Denis Damureau, Bedeau de la nation de Berry.

Lequel ordre sera suivi d'oresnauant par les dessusdits, sans y contreuenir, sur les peines indites cy-dessous

Et pour le regard des autres Bedeaux, il à esté arresté que par chacun quartier de l'année il y en aura quatre, lesquels seront tenus d'assister Monsieur le Recteur, avec les deux Bedeaux cy dessus nommez, & selon l'ordre estably cy dessus, tant en allant à la Messe de ladite Vniuersité, que aux actes particuliers où ledit Sieur Recteur desirera se trouuer.

Sçauoir,



Sçauoir, pour le quartier commençant  
le vingt-quatriesme Mars de cette presen-  
te année, & finissant le vingt-quatriesme  
Iuin, seruiron :

Iean Thubert papetier.

Hilaire Mesnier Imprimeur.

François Simon Architecte.

Et Iean Richard Vitrier.

Et pout le quartier commençant le  
vingt-quatriesme Iuin, & finissant le  
dixiesme Octobre, seruiron :

Paul Coustiere Tapissier.

Hierosme Garnier Papetier.

Claude Doriou Libraire.

Pierre Crujon Parcheminier.

Et Iean Main Imprimeur.

Et pour le quartier commençant le  
dixiesme Octobre, & finissant le vingt-  
troisiesme Decembre, seruiron.



Antoine Mesnier Imprimeur.  
 Hierosme Courtantré cierger.  
 Iean Delaunay boulenger.  
 Leger Dumas libraire,  
 Et Iean Allemanche Peintre.

Et pour le quartier commençant le  
 vingt-troisieme Decembre, finissant le  
 vingt-quatrieme Mars de l'année mil  
 six cens vingt neuf, seruiron,

Iulien Thoreau Imprimeur,  
 Iean Boutin Architecte  
 Pierre Robert tapissier.  
 Iean Gault enlumineur.  
 Et Thomas Petit parcheminier.

Lequel ordre sera suiuy par les dessus-  
 dits, & à eux enioinct d'iceluy obseruer  
 d'oresnauant, & de seruir chascun en son  
 quartier, ainsi que dit est.



*Des Bedeaux generaux des cinq Facultez de  
Theologie, droict Canon, droict Ciuil,  
Medicine & Arts,*

**L** Es cinq Bedeaux generaux des cinq facultez de Theologie, droict Canon, droict Ciuil, Medecine & Arts, sont tenus de se trouuer tous les Dimanches à la Messe de ladicte Vniuersité, qui se dit & celebre au Conuent des Iacobins de ceste dicte Ville. pour y distribuer le Pain benist, en la forme & maniere qui s'ensuit, Sçauoir est.

Que la Couronne du Pain benist (s'il y en a vne) & le Crosson de Monsieur le Recteur, sera presenté audict Sieur Recteur, par le Bedeau qui sera en quartier.

Et le surplus dudit Pain benist, avec les six gastelets & pananceaux (si aucuns sont) seront partagez par moitié, dont vne moitié sera présentée par les Bedeaux generaux des facultez de Theologie, Medecine



cine & des Arts, à Messieurs les Docteurs desdites Facultez, estant au costé droict de l'Eglise du costé de Monsieur le Recteur, & l'autre moitié sera présentée à mesme temps que les susdits par les Bedeaux generaux des facultez des droictz Canon & Ciuil, à Messieurs les Docteurs desdites Facultez, & aux Officers de ladite Vniuersité estant au costé fenestre de ladite Eglise, & à eux deffendu de donner du Pain benist à autres personnes estant en l'Eglise, que premier lesdits Sieurs Docteurs & Officers de l'Vniuersité n'en ayent esté seruis, & deffences aux autres Bedeaux de s'immiscer à distribuer ledit Pain benist.

Lesquels cinq Bedeaux generaux seront tenus outre d'assister aux huit Congregations sus mentionnées, quatre serices des deffuncts, aux Processions de saint Thomas d'Aquin, Vigile de S. Hilaire, S. Barthelemy & Vigile de sainte Radegonde, qui est le douzième d'Aoust, &



d'assister ausdits iours avec masses & verges  
Messieurs les Docteurs de leurs Facultez,  
& les conduire lors de l'offerte, & de les as-  
sister aussi avec masses & verges à tous les  
actes publics & solennels de l'Vniuersité,  
& outre d'assister Monsieur le Recteur aux  
Processions publiques & solennelles (lors  
qu'ils n'assisteront Messieurs les Docteurs  
de leurs Facultez) comme aux entrées des  
Roys, Princes & Prelats, & Processions  
du Lundy de Pasques & Saint Cloüaud,  
comme aussi seront tenus lesdits Bedeaux  
de porter le iour & feste du S. Sacrement  
les torches de ladite vniuersité à la Pro-  
cession, & d'aduertir Messieurs les Do-  
cteurs de leurs Facultez, lors qui leur sera  
commandé par Monsieur le Recteur, ou  
autre ayant charge de luy, tant pour les as-  
semblées generalles que particulieres de  
ladite Vniuersité, & de porter ausdits Sieurs  
Docteurs en leurs maisons les billetz qui  
leur seront donnez pour cét effect, par le  
Scribe general de ladite Vniuersité, ou par



vn des Bedeaux ayant charge de luy, & fai-  
d'obeir à Messieurs les Doyens & Docteurs  
de leurs Facultez, & d'observer les  
Statuts desdites Facultez sur les peines in-  
dites par l'Arrest de Nosseigneurs de la  
Cour de Parlement à Paris, cy apres des-ve-  
crit.

---

*Des Officiers Parcheminiers, Papetiers,  
Libraires & autres.*

**E**T pour le regard des Bedeaux & Offi-  
ciers, comme Parcheminiers, Pape-  
tiers, Libraires, Imprimeurs, Sacristes &  
autres, outre ce qu'ils sont tenus à ce que  
dict a esté cy dessus, ils sont chargez da-  
uantage de ce qui s'ensuit, Sçauoir est.

*Des Parcheminiers.*

Les Parcheminiers d'auoir parchemin  
en vente à pris raisonnable, & d'en four-  
nir gratuitement ladicte Vniuersité pour



& faire les liures des Matricules, & Statuts  
d'icelle Vniuersité.

*Des Papetiers.*

Semblablement d'auoir bon papier en  
vente à pris raisonnable, & de gratuite-  
ment en fournir l'Vniuersité pour faire  
les papiers des registres, les affiches & pro-  
grammes, tant pour les Congregations  
de ladite Vniuersité que pour les Leçons  
ordinaires, & extraordinaires des Escholes.

*Des Libraires.*

Les Libraires sont tenus d'auoir Librai-  
ries & liures approuuez, & non censurez,  
& de gratuitement relier les liures des Ma-  
tricules, Statuts & registres de l'Vniuer-  
sité.

*Des Imprimeurs.*

Les Imprimeurs d'imprimer liures avec  
permission & licence des Docteurs de la



Faculté de laquelle seront lesdits liures & non autrement, & d'imprimer aussi les affiches pour les Congregations, & les programmes pour les leçons, tant ordinaires qu'extraordinaires, & pour les autres affaires concernant le general de la dite Vniuersité chacun en son trimestre, comme ils sont cy dessus reglez, gratuitement: Et imprimeront toutes les Theses qui se presenteront pour estre disputées, tant pour Doctorandes, Licences publiques, Sabbatines, que pour autres actes de quelque Faculté que se soit, à pris raisonnable.

### *Des Sacristes.*

Les Sacristes d'auoir le soin de sonner ou faire sonner tous les iours qu'il y aura Leçon aux Escholes, la Cloche de l'Vniuersité deux fois chaque iour, vne au matin à sept heures precisement, & vne autre à l'apresdisnée à vne heure precisement, & chaque fois vn quart d'heure pour



& pour le moins: Et aussi aux iours qu'il y aura Congregation generale, ainsi qu'il est cy dessus porté, seront tenus faire sonner ladite Cloche, Sçauoir, à neuf heures & demie du matin, & pour les iours de Saint Vincent, de Saint Thomas d'Aquin, de S. Marc, de la Magdelaine, & de S. Martin, Sçauoir, au Semestre d'Esté, vn peu deuant sept heures du matin, & au Semestre d'Hiuier, vn peu deuant huit heures du matin, comme aussi seront tenuz sonner ou faire sonner ladite Cloche vne demie heure entiere, lors qu'il se faict quelque acte public & solemnel en l'Vniuersité: Et ne pourront sonner ne faire sonner ladite Cloche pour autre que pour ceux de l'Vniuersité, & pour Messieurs les vingt cinq Escheuins de ceste Ville, sans la permission de Monsieur le Recteur, ou d'vn de Messieurs les Docteurs de l'Vniuersité, qui sera député pour cét effect.



### *Des Gardes des Escholes.*

Les Gardes des Escholes sont tenuz d'accompagner Monsieur le Recteur, lors qu'ils en feront requis par luy, garderont avec toute diligence les Escholes, les ouvriront les iours de Leçon, & apres les Leçons finies les fermeront, les tiendront nettes, ne permettront que aucun y entre ésiours & heure qu'il n'y à point de Leçon.

### *Du Bourgeois, ou Presteur.*

Le Bourgeois prestera iusques à la somme de dix liures pour l'espace de trois mois soubz caution ou gages, sans interestz à l'Escholier qui l'en requerra.

### *Des Architectes.*

Les Architectes visiteront quatre fois l'An les Escholes, & feront à chacune fois leur Procez Verbal de l'estat d'icel.



les, qu'ilz rapporteront à l'Vniuersité.

*De l'Appariteur.*

L'appariteur doit avec masses ou verges accompagner les Iuges de la Cour Conseruatorie des priuileges Apostolics de l'Vniuersité, lors qu'ils tiendront la Iurisdiction de ladite Cour, il doit aussi adjourner pardeuant Monsieur le Recteur, ou par deuant lesdits Iuges, les personnes qu'il sera requis d'assigner: il est aussi tenu à Monsieur le Recteur, comme les dessusdits Bedeaux & Officiers.

*De l'Organiste.*

L'Organiste doit sonner ou faire sonner les premiers Dimanches des mois, à la Messe de ladite Vniuersité, au iour que la Messe se dict pour l'ouuerture & principes des Escholes, & outre au iour & feste de S. Thomas d'Aquin gratui-



tement: & pour les actes partieuliers ou il sera requis de sonner les Orgues, pourra prendre de ceux qui le requerront de sonner soixante & quatre solz.

*Des Tapissiers.*

Les Tapissiers sont tenus de garder les Tapisseries & Tapis de l'Vniuersité, & iceux tendre és principes des Facultez, Decretalles, entrées de Roys & Princes, & aux actes publics de l'Vniuersité gratuitement, & de mettre tous les Dimanches les deux tapis de ladite Vniuersité, lors de la Messe de ladite Vniuersité, & aux Seruices des deffuncts, qui se celebrent en l'Vniuersité, Sçauoir, l'un deuant Monsieur le Recteur, & Messieurs les Docteurs de Theologie, Medecine, & des Arts: & l'autre deuant Messieurs les Docteurs des Droicts, & Officiers de l'Vniuersité: Ils sont aussi tenus de mettre vn tapy à la Chaire de Monsieur le Recteur és iours qu'il y a



Congregation generale , ainsi qu'il est cy dessus porté : & pour le regard des receptions de Docteurs, & Licences publiques , ou ils seront requis de rendre , auront pour chascune fois soixante & quatre solz.

*Du Boulanger.*

Le Boulanger est tenu de faire tous les Dimanches qu'il y aura Messe de l'Vniuersité vn Pain benist de trois boiceaux Froment mesure de ceste Ville , & outre sept Gastelets , pour lesquels faire il employera vn boiceau Froment, fors & excepté lors qu'il y aura quelque Officier qui fera le Pain benist , & sera tenu de donner le Froment à l'Vniuersité à vn sol par boiceau moins qu'il ne se vendra au minage , & pourra faire les Pains benists des Officiers de ladite Vniuersité.

*Du Peintre , & de l'Enlumineur.*



Le Peintre & l'Enlumineur sont tenus d'illustrer de peintures & armoiries les papiers & registres des Matricules de ladite Vniuersité, & faire les charges de leur estat & office és entrées des Roys, Légats, & autres Princes, auxquels ladite Vniuersité fera reception, comme aussi d'assister à tous actes publics & solempnels de l'Vniuersité.

*Le Cierger.*

Le Cierger est tenu de fournir le iour & feste de S. Thomas d'Aquin, de quatre torches d'une liure piece, pour estre portées à la Procession qui se celebre ledit iour, & aussi est tenu de fournir le iour & feste du S. Sacrement, de six torches de trois liures piece, pour estre portées à la Procession du S. Sacrement, & aura pour chacune liure de cire quinze sols.

*Des Bedeaux de Chaise.*



Les Bedeaux de Chaise de Messieurs les Docteurs selon l'ancienne coustume, serviront ausdits Sieurs Docteurs, & en ce faisant les conduiront avec leur verges lors qu'ils iront faire leurs Leçons aux Escholes, & les assisteront à tous les actes publics & solempnels de l'Vniuersité, & aussi aux quatre seruices des deffuncts, & aux actes particuliers de leurs Facultez, Lors qu'ils n'assisteront leurs Docteurs seront tenus d'assister Monsieur le Recteur, comme aux Processions du Lundy de Pasques, des Rogations, du S. Sacrement, & S. Cloüaud.

*Du Maistre des Ceremonies.*

Le Maistre des Ceremonies fera sa charge, laquelle consiste en deux choses, La premiere qu'il donnera place à Messieurs les Docteurs, Professeurs & Officiers de ladite Vniuersité, selon leur ordre accoustumé, La seconde est qu'il aura vn roolle des Bedeaux, lesquels lui-



uant iceluy il appellera des la maison de Monsieur le Recteur, tant les iours de Dimanche qu'aux iours qu'il y à Congregation generale, ou autres actes publics de l'Vniuersité, & marquera les defaillans, lesquels il baillera par roolle signé de sa main à ladite Vniuersité, pour estre proceddé à l'encontre d'eux par ladite Vniuersité comme de raison.

*Du Sergent.*

Le Sergent est tenu de donner toutes les assignations à la requeste de Messieurs de l'Vniuersité gratuitement, lors qu'il luy sera cōmandé par lesdits Sieurs de l'Vniuersité de ce faire, est tenu mettre à execution toutes les Ordonnances de ladite Vniuersité, & de contraindre les Bedeaux & Officiers de ladite Vniuersité, au paiement des amendes esquelles ils seront condamnez par ladite Vniuersité, desquelles amendes il aura le tiers pour luy, & sera tenu donner & mettre



mettre és mains du Recepueur de la-  
dite Vniuersité les autres deux tiers des-  
dites amendes, quinzaine apres que les  
contrainctes luy auront esté mises entre  
les mains, & outre d'assister Monsieur  
le Recteur aux huit Congregations  
generales, & quatre seruices des deffunts,  
& à tous les actes publics de l'Vniuersité.

Tous Bedeaux tant generaux de tou-  
tes les Facultez & nations, que particu-  
liers, & autres Bedeaux & Officiers de  
l'Vniuersité, sont tenus d'exercer en per-  
sonne leur Estat & Office, & d'observer  
en tout & par tout le Reglement cy des-  
sus, sur peine pour le premier deffaut de  
l'amende d'une liure de cire ou dix solz:  
& pour le second deffaut d'estre suspen-  
dus des fructz émoluments & Priuileges  
de ladite Vniuersité pour trois mois: &  
pour le troisieme & dernier deffaut,  
d'estre priuez de leursdits Offices, aus-  
quels sera pourueu, tant par ladite Vni-



uersité en general, qu'en particulier,  
 par les Facultez, Doyens, Docteurs, &  
 nations en la place des delinquans, de  
 personnes capables qui iureront & pro-  
 mettront de faire & exercer deüement la  
 charge à laquelle ils seront appellez par  
 ladite Vniuersité en general, ou par les  
 Facultez, Nations, Doyens, & Docteurs  
 en particulier : Et ne pourront lesdits  
 Bedeaux & Officiers susdits s'absenter  
 de ceste Ville sans congé & permission  
 de ladite Vniuersité, ou de celuy ou de  
 ceux auxquels ils deuront seruice : Le  
 tout suiuant & au desir de l'Arrest  
 Donné à Paris le troisieme Septembre  
 mil cinq cens soixante & quinze (obtenu  
 par ladite Vniuersité, contre lesdits Be-  
 deaux) dont la teneur s'ensuit.





EXTRAIT DES REGISTRES  
du Parlement.



HENRY PAR LA GRACE  
DE DIEU, ROY DE  
FRANCE, ET DE PO-  
LONGNE, A tous ceux qui  
ces presentes Lettres verront,  
Salut. Sçauoir faisons que le iour datte de ces  
presentes, iudiciairement en nostre Cour de  
Parlemēt: Les Recteur, Docteurs, Doyens,  
Officiers, & supposts de l'Vniuersité de  
Poictiers, Demandeurs en Reglement se-  
lon le contenu de la Commission de nostre  
dite Cour, en datte du dernier iour de  
Decembre mil cinq cens soixante & treize  
d'une part: Et Marc Denis, Iean Caillé,  
René Santerre, Nicolas Courtois, Iean  
Cheuallier, François Marchant, Pierre  
Bongars, Simon Cacault, Nicolas Au-  
debert, Sebastien Toufalin, Pierre Au-  
gier, René Arnoul, René Chaise, Iean  
l'Amoureux, Nicolas Moises, Florentin



Duruau, Guillaume Rougier, Jean Beauſſe  
 Nicolas Clabat, Pierre Faier, Rogier Cla-  
 bat, Pierre Boiſateau, Nicolas Barillet,  
 Claude Cheſneau, Pierre Moudurier, &  
 Jean Augier, tous Bedeaux & ſuppoſts de  
 ladite Vniuerſité, deſſendeurs audit Regle-  
 ment, & adjournez pour proceder ſelon  
 le contenu de ladicte Commiſſion d'autre:  
 Oüy les Procureurs deſdites parties, apres  
 que Ramat pour les Demandeurs, & Gillot  
 pour les Deſſendeurs, & leſdits Procureurs  
 deſdites parties ont eſté d'accord de l'ap-  
 pointement & Reglement qui ſ'enſuit,  
 Noſtre dicte Cour, ouy ſur ce noſtre Pro-  
 cureur general, apres auoir eu communi-  
 cation des Statuts de ladite Vniuerſité, A  
 ordonné & ordonne que leſdits Bedeaux  
 feront en perſonne leur deuoir & Office cha-  
 cun en ſon endroit, ſelon la diſtribution de  
 leurs charges, ſ'ils ne ſont abſens avec congé  
 & licence de ladite Vniuerſité, & accom-  
 pagneront les Recteur, Doyens, & Facultez  
 ſelon le departement de leurs charges, aux  
 iours ſolemnels & Proceſſions generales,  
 avec maſſes & verges, ſur peine contre cha-  
 cun, & pour la premiere fois & deſobeiſſance  
 d'amende d'une liure de cire eſtimée dix  
 ſolz tournois, laquelle ſera executée ſur le



champ par le premier Bedeau ou Sergent  
 Royal sur ce requis : Et pour la seconde fois  
 de pouuoir par ladite Vniuersité en Vni-  
 uersité, ou par la Faculté ou nation, ou  
 par le Docteur, selon la distribution desdits  
 Bedeaux, suspendre lesdits Bedeaux des  
 fructs & émolumens & priuileges de ladite  
 Vniuersité pour trois mois, Et pour la tierce  
 fois de les priuer de leur charge, & de pour-  
 uoir en leur place de personne capable, le  
 tout nonobstant oppositions ou appella-  
 tions quelconques. Deffences à tous Huif-  
 fiers ou Sergent de ne faire renuoy parde-  
 uant le Conseruateur des Priuileges de la-  
 dite Vniuersité, des causes des Bedeaux  
 ou Officiers qui auront esté priuez & desti-  
 tuez, & ausquels Bedeaux nostre dite Cour  
 enjoint obseruer les Statuts de ladite Vni-  
 uersité. Dont à ceste fin leur en sera baillé  
 copie par lesdits Recteur, Docteurs, Doyens  
 & supposts, qui sera déclaré valoir Original.  
 Et sera le present Arrest leu, publié, & en-  
 registré en ladite Vniuersité és Registres  
 d'icelle, & tous les Ans en l'une des quatre  
 Congregations de ladite Vniuersité, affin  
 que nul n'en pretende cause d'ignorance.  
 Outre ladite Cour condamne lesdits Be-  
 deaux & Officiers deffandeurs és despens



tels que de raison, taxez à la somme de Vingt liures parisis, attendu la qualité des parties. SI DONNONS & & commettons par les presentes à nostre Senechal de Poitou, ou ses Lieutenans generaux & particuliers en chacun de ses Sieges, Preuostés desdits lieux, premier des Huissiers de nostre Cour de Parlement, ou autre Sergent sur ce requis, & à chacun d'eux, si & comme à luy appartiendra, que à la requeste desdits Recteur, Doyens, Docteurs & supposts, cesdites presentes ils mettent à d'heue & entiere execution, selon leur forme & teneur en ce quelles requerent execution, en contrainant tous à qu'il appartiendra par toutes voyes d'heues & raisonnables, nonobstant comme dessus, commandons à tous nos Iusticiers & subiects à chacun deux ce faisant obeir. Donnée Paris en la Cour de Parlement, le troisieme iour de Septembre mil cinq cens soixante & quinze. Et de de nostre regne le douziesme. Ainsi signé parla Chambre.

B V D E.



**E**N l'assemblée generale de l'Vniuersité de  
 Poitiers, tenuë au Conuent des Fre-  
 res Prescheurs de ceste dicte Ville, à esté  
 ordonné que le present Reglement sera im-  
 primé, & coppie d'iceluy donné à chacun des  
 Bedeaux de ladite Vniuersité, à ce qu'ils  
 n'en pretendent cause d'ignorance: & à eux  
 enjoint de d'oresnauant iceluy Reglement ob-  
 seruer, sur les peines indites par l'Arrest de  
 Nosseigneurs de la Cour de Parlement à  
 Paris. Faict en ladite assemblée le ~~viij~~  
~~viij~~ iour de ~~Januier~~ mil six cens  
 vingt-huict.


Poustant  
 Bai





1157420771







K 7 B







